



Sheria ya Mungu Inadumu Milele

A8. mri zake zote ni amini. Zimethibitika milele na milele.—**Zaburi 111:7,**

“Kisha hekalu la Mungu lililoko mbinguni likafunguliwa, na sanduku la agano Lake likaonekana ndani ya hekalu lake” (Ufunuo 11:19). Sanduku la agano la Mungu liko ndani ya patakatifu pa patakatifu, chumba cha pili cha hekalu. Katika huduma ya hema la duniani, ambalo lilitumika “kama mfano na kivuli cha mambo ya mbinguni,” chumba hiki kilifunguliwa tu wakati wa Siku kuu ya Upatanisho kwa ajili ya utakaso wa hema. Kwa hiyo, tangazo kuwa hekalu la Mungu lilifunguliwa mbinguni na sanduku la agano Lake lilionekana huelekeza kwa ufunguaji wa patakatifu pa patakatifu pa hekalu la mbinguni mwaka 1844 wakati Kristo alipoingia pale kutekeleza kazi ya kukamilisha upatanisho.

Wale ambao kwa imani walimfuata Kuhani wao Mkuu wa mbinguni wakati akiingia katika huduma Yake ya patakatifu pa patakatifu, waliliona sanduku la Agano Lake. Walipokuwa wamejifunza somo la hekalu takatifu walipata uelewa wa badiliko la Mwokozi la huduma, na waliona kuwa sasa alikuwa akihudumu mbele ya sanduku la Mungu, akitumia damu yake kusihi kwa ajili ya wenye dhambi.

Sanduku katika hema la duniani lilikuwa na mbao mbili za mawe, ambazo juu yake ziliandikwa kanuni za sheria ya Mungu. Sanduku lilikuwa kasha tu la kuhifadhi mbao za sheria, na uwepo wa kanuni hizi za Mungu ulilipatia sanduku lile thamani yake na utakatifu wake. Wakati hekalu la Mungu lilipofunguliwa mbinguni sanduku la agano Lake lilionekana. Ndani ya patakatifu pa patakatifu, katika hekalu la mbinguni, sheria ya Mungu imehifadhiwa katika hali ya utakatifu—sheria iliyotangazwa na Mungu Mwenyewe katikati ya radi za Sinai na kuandikwa kwa chanda Chake mwenyewe kwenye mbao za mawe.

Sheria ya Mungu katika hekalu la mbinguni ndiyo nakala halisi ya sheria ya Mungu, ambayo kanuni zilizoandikwa juu ya mbao za mawe na kuandikwa na Musa katika Torati ilikuwa hati isiyokosea. Wale waliofikia uelewa wa jambo hili muhimu waliongozwa hivyo kuona tabia takatifu, isiyobadilika ya sheria ya Mungu. Waliona vizuri zaidi, kuliko hata kabla ya hapo, uzito wa maneno ya Mwokozi: “Mpaka mbingu na nchi zitakapoondoka, yodi moja wala nukta moja ya torati haitaondoka” (Mathayo 5:18).

Sheria ya Mungu, kwa kuwa ni ufunuo wa mapenzi Yake, maelezo ya tabia Yake, ni lazima idumu milele, “kama shahidi mwaminifu wa mbinguni.” Hakuna amri hata moja ambayo imefutwa; hakuna yodi wala nukta ambayo imebadilishwa. Mtunga zaburi ameandika: “Ee Bwana, neno lako lasimama Imara mbinguni hata milele.” “Maagizo yake yote ni amini, Yamethibitika milele na milele” (Zaburi 111:7, 8) (Pambano Kuu. Toleo jipya uk. 359 – 360).